

HEXENREDE 2018

Grüß Gott und Hellau ihr liabe Narraleit,
mir Hexa hoisat eich wieder herzlich willkomma heit.
Durchs ganze Städtle semmer g'fahra,
dia Männer send ons nauchg'laufa, en Schaara.
Mir hant natürlich nur die Schönste mit auf da Waga
g'nomma,
mit leuchtende Auga hant se onser Leiterle erklomma.
Ond wia mir dann hant d's Rathaus a'visiert,
dao hant mir Hexa oos ja gar net geniert,
den Schultes, den hant mir scho bälde g'fanga,
ganz tapfer isch er mit oos zom Waga g'anga.
Natürlich hätt's dr Schultes liaber g'sea,
wenn ER d'r Bulldogfahrer g'wesa wär.
Aber deam hant mirs zoigt, was glaubt denn der Wicht,
so was gibt's doch bei oos Hexa nicht.
Der Kerle isch doch d's ganz Jaohr emmer vorna dra',
am End moint'r no, dass er was ka.

So mei Hexasekretärin, jetzt gang mal naus,
ond hol d'r Schultes auf oosran Waaga rauf.
Komm Bürschle und hogg di auf dei Fiedla na,
damit i endlich richtig a'fanga ka.
Hör jetzt guat zua, was d's Volk so spricht,
mir Hexa ziehet wieder ins Gericht.

Wie du siehsch, hant mir unser ganzes Hexabüro
drbei,
da gukat mir heut mal wieder ganz genau nei.
In deane Ordner - send unsre ganze Vorschläg und
Wünsche g'landet,
ond in dia dahanna - send all deine Fehler und
Schandtata g'wandert.
Da onda standat au no so a paar Ordnerexemplare rom,
aber mei, des isch alles Ausschuss, da guck mr heit gar
nemme nomm.

Iris, bring mir doch glei mal d' erste Ordner her,
puuuh, da liegt ja scho Staub drauf, mmh, aber, der
isch emmer no net leer.

Vorweg no des oine, Schultes, des musch wissa,
sonsch hasch bei uns Hexa schnell verschissa.
Im Pläne schmieda send mir fei fix,
ond mir sagat osre Wünsche, da kennat mir nix.

Aaah, genau, da war dees:
Woisch, für des Wegle da drüba, da hant mir Hexa als
ERSTE an Nama kett,

doch dr Gmoidrat damals fand oosern Vorschlag ja
leider gar et nett.

Aaaaber - wenn mir Fraua was wellat, dann bleibat
mir dra,

**drom liebe Leit, kommt dau drieba des Schild
„Hexagässle“ wieder na.**

Ond wenn wir scho grad so beim Nama geba send,
unsern Kieni-Kroisel, den kennt ja inzwischa jedes Kend.

Jetzt hand mir Hexa so vor oos nadenkt,
ob d'r Bremer sich wohl freit, wenn ma dem au so an
Kroisel schenkt.

Am Wasserturm, da könnt ma so oin doch no braucha,
die schnelle Auto's deant dia Leit da doba ganz schee
schlauchu.

Jawoll, a Bremer-Kroisel, der macht Schluss mit der
Raserei,
und middanei stellat mir von dir des **schönste Foto** nei.

Ach so, d' Herr Gekeler braucht ja dann scho au no oin,
sonschd said der doch, Mensch, i han wieder koin.
Außerdem hat der letzschd Jaor sein 90er kett,
dau wär doch so a Namensgäbung richtig nett.
Mir nemmat den Kroisel nach Soda naus,
ond machat a Schild mit Gekeler-Kroisel drauf.

Gell Schultes, dau gucksch na,
was a Hex so alles ka.

Seit kurzem isch ooser Städtle **weltweit** bekannt,
mir wurdat zum „Weltkulturerbe“ ernannt.
Glei hant mir Hexa gschaltet ond fleißig mitdenkt,
was machat mir, dass der Archäopark doch no was
brenkt.

Ond du wirsch lacha, dia Lösung isch gar et schwer,
jetzt muss endlich dia U-Bahn-Station her,
du machsch d' Fahrer, mir Hexa d' Plan,
i seh scho, du bisch dodal angetan
von dem neia Verkehrsnetz vor oosrer Nas,
koi Mensch benutzt dann mehr dia alda Straß.
Endlich köndat mir unterirdisch zum Archäopark
fahra,
ond bei oosre Besa derweil dia Flugkraft aufspara.

A Fernsehturm dät in d' Archäopark super neibassa,
dao könntat mir d' Blick übers **„schöne Lonetal“** lassa,
em Sommer hoggat mir dann alle dau doba,
ond deand d' Kaffee ond Kuacha von oba loba.

Au d' beschda Empfang könnad mir auf am Fernsehturm nutza,
weil hier in der Stadt isch Handy und Internet-Empfang echt zum „**KOTZA**“.

Mir hant Idea, gell dau bisch platt,
ja mir Hexa, send net emmer bloß glatt.
Mir missat au rechna ond denka ond plana,
om irgendwo für oos was abzomsahna.

Damit wär mr au scho beim nächschda Thema angelangt,
schnauf et so, da kommt schon no allerhand.
A Hexadomizil solldad mir scho längstens bekomma,
zerschd wird uns alles versprocha ond dann doch wieder gnomma.
Ja, ja, mir Hexa hand emmer no koi Heim,
des fendat mir fei scho ganz schee gemein.
Aber halt, mir fällt ei, da wird ja bald was frei,
des Grundschulgebäude, ja Heidanei.
Bevor du lang überlegsch, was passiert mit der Schual,
mir fändat a Hexaküche mit Kräutergärtle recht cool.
Gnuag Platz für oosre Besa, zom trainiera an Saal,
Schultes gib zua, du hasch gar koi andra Wahl,
gib oos des Deng, dann isch's au scho gschwätzt,
HEXA ... von uns wird dia Grundschual besetzt.

Gell Schultes, dau gucksch na,
was a Hex so alles ka.

Hexensekretärin: „Halt ... Walburga ... dau fällt mir was ei, guck doch au amaul in den Lob-Ordner nei“.

Dank dr schea, dean hätt i jetzt faschd vergessa ...

Dia Sperrung der Ulmer Straoß, des war so a Sach,
6 Wocha hats ghoisa, dass i net lach.
Deam Umleitungspla nauch han i denkt,
der Verkehr wird über Hamburg glenkt.
A jeds Eck war mit Kontrolla und Schilder bestückt,
fährsch nei, wirsch mit ma Strafzettel beglückt.
Hättsch oos gfragt, mir hättet dir könn saga,
mit Eibahstraoßa wärsch dau besser gfahra.
Aber sei's wie's will, oos Hexa hasch „Gutes getan“,
mit einer mega Hexa-Landebahn.
Dia Ulmer Straoß, beleichdad wie em Großstadtflair,
Iris, hol doch glei mal dia nuimodische Brill für d'
Archäopark her.

Dann blendats nemme so und mir sehat cool aus,
wenn mir aus am Ort fliegat mit Karacho naus.
Anstatt Mammuts hand mir dann Hexa-Visiona,
dia Brilla-A'schaffung soll sich ja schließlich au lohna.

Gell Schultes, dau gucksch na,
was a Hex so alles ka.

„**Niederstotzingen soll freundlicher werden**“, Leit,
hand ihr scho gsea?,
Smileys lachat im ganza Ort, doch „no“ scheaner wär gwea,
wenn anstatt am Smiley a Hexaköpfe aufleuchda duat,
vielleicht au mit am Besa samt Hexahuat.
Wenigstens in der Faschingszeit keedsch des für oos macha,
dann hättat dia Leit nooooo mehr zom lacha.

Was isch jetzt dees?
Aaah, stimmt ja, d' „Schandtaten-Ordner“ gibt's ja au no ...
Schultes, siehsch, des Jaor hasch no ganz schea viel Glück,
aaaaaber sei auf dr' Huat, **mir hand di im Blick.**
Lang bisch ja no net im Amt und könnat net viel schlechtes berichta,
aaaber ab am nächschda Jaor werrad mir di sauber richda.

Deshalb isch jetzt Schluss mit der Lobhudelei,
du moinsch z'letscht, des muass emmer so sei,
daraus wird nex, des isch dir scho klar,
mir send ja net d'Wohlfahrt, sondern d'Hexaschar.

Bis Aschermittwoch, des wissat d'Stotzinger Leit,
es in ooserm Städtle koin Schultes geit.
Mir Hexa hant des Amt übernomma,
mit eire Sorga, könnat ihr zu oos jetzt komma.
Mir reglat alles, ohne Bürokratie,
schnell, sicher, mit Humor und Fantasie.
Jetzt aber dea'mer auf am Marktplatz Party macha,
mit eich liabe Leit - feira, danza ond lacha.
A Brautwurscht, a guat's Tröpfle, a coola Musik,
Sonscht fehlt doch nix zu oosram Hexa-Glück.



Stotzinger Hex
Stotzinger Hex, Hex
Stotzinger Hex, Hex, Hex

